

Ni Presidente Thomas S. Monson

Ti Nadiosan a Sagut ti Panagyaman

Ti managyaman a puso . . . ket sumangbay babaen ti panangyebkas iti panagyaman iti Nailangitan nga Ama para kadagiti paraburna ken kadagiti adda iti aglawlawtayoy para iti amin nga isangbayda iti biagtayo.

Nakaskasdaaw daytoy a sesion. Idi nadutokanak a Presidente ti Simbaan, kinunak, “Uma-wataкто iti maysa a naituding nga aramiden para iti bagik. Agbalinakto a mamalbalakad ti Tabernacle Choir.” Ipagpannakkelko unay ti korok!

Kinuna ni nanangko iti naminsan kaniak, “Tommy, ipagpannakkelko unay ti amin nga inaramidmo. Ngem adda maysa a masaok kenka. Nagtali-naedka koma iti piano.”

Isu a napanak iti piano ket tino-karko ti maysa a piesa para kenkuana: “Inkami, [inkami] iti birthday party.”¹ Sa inagak ti musingna, ket inarakupnak.

Pampanunotek isuna. Pampanunotek ni tatangko. Pampanunotek ti amin a General Authority a nangimpluensia kaniak, ken dagiti daddumapay, agraman dagiti balo a babbai a sinarungkarak—85 kadakuada—ti adda manokna a mailuto, no dadduma bassit a kuarta iti bolsada.

Sinarungkarak ti maysa iti maysa

a naladaw a rabii. Tengnga ti rabii idi, ket napanak iti nursing home, ket kinuna ti receptionist, “siguradoak a matmaturugen isuna, ngem kinunana kaniak a siguraduek a riingek isuna, gapu ta kinunana, ‘Ammok nga umayto isuna.’”

Inigganak ti imana; inyawagna ti naganko. Siriring isuna. Indepplena ti imak iti bibigna ket kinunana, “Ammok nga umayka.” Apay koma a diak umay?

Sagidennak ti napintas a musika iti kasta a wagas.

Patpatgek a kakabsatko, nangngantayon dagiti naparegta a mensahe ti kinapudno, ti namnama, ken ti ayat. Naiturong ti panunottayo Kenkuana a nangsubbot kadagiti basbasoltayo, isu a nangipakita kadaytoy iti wagas tapno agbiag ken no kasano ti agkararag, ken isu a nangipakita babaen kadagiti bukodna nga aramid kadagiti bendision ti serbisio—kas iti Apo ken Mangisalakantayo, ni Jesucristo.

Iti libro ni Lucas, maika-17 a

kapitulo, mabasatayo ti maipapan Kenkuana:

“Ket naaramid nga idi mapanda idiy Jerusalem, nagna iti nagtengngaan ti Samaria ken Galilea.

“Ket idi simrek iti maysa a purok, simmabet kenkuana dagiti sangapuloy a tao nga agkukutel, a nagsardengda iti adayo:

“Ket nagpukkawda a kunkunada, Jesus, Mannursuro, kaasiannakami.

“Ket idi makitana ida, kinunana kadakuada, Inkayo agparangkayo kadagiti papadi. Ket naaramid nga idi magmagnada a mapan, nadalusanda.

“Ket maysa kadakuada, idi makitana nga nadalusanen, nagsubli a dinaydayawna ti Dios iti dakkal a timek,

“Ket inruknoyna ti rupana kadagiti saksaka ni Jesus, a nagyaman kenkuana: ket daytoy taga Samaria.

“Ket simmungbat ni Jesus ket kinunana: Saanda a sangapuloy aya dagiti nadalusan? ket dagiti siam adino ti yanda?

“Awan ti nagsubli a nagyaman iti Dios no saan a daytoy a ganggannaet.

“Ket kinunana kenkuana, Tumakderka, inkana: ti pammatim insalakannaka.”²

Babaen ti nadiosan a panagballaet naispal dagita nga agkukutel manipud iti naulpit, in-inut nga ipapatay ken naikkan iti baro a gundaway a panagbiag. Ti nayebkas a panagyaman ti maysa nga agkukutel ket naipaayan iti parabur ti Maestro; ti kinaawan panagyaman nga impakita ti siam nga agkukutel ket nangipaay iti pannakaupay Kenkuana.

Kakabsatko, malagiptayo kadi ti mangted panagyaman kadagiti parabur nga aw-awatentayo? Ti napudno

a panagyaman ket saan laeng a mangtulong kadatayo a mangbigbig kadagiti paraburtayo, no di ketdi pay manglukat kadagiti ridaw ti langit ket mangtulong kadatayo a mangrikna iti ayat ti Dios.

Kinuna ti ay-ayatek a gayyemko a ni President Gordon B. Hinckley, “No agbibigkayo nga addaan iti panagyaman, saankayo a nga agbibigkayo nga addaan iti kinakuspag ken kinatangig ken kinamanagimbukod, agbibigkayo nga addaan iti espiritu ti panagyaman a mayannatup kadakayo ken mangbendisonto iti panagbiagyo.”³

Iti libro ni Mateo iti Biblia, adda sabali pay a pakasaritaan maipapan iti panagyaman, iti daytoy a gundaway kas maysa a panangipeksa manipud iti Mangisalakana. Bayat ti panagdaliasatna iti let-ang iti uneg ti tallo nga aldaw, nasurok a 4,000 a tattao ti simmurot ken nakipagdaliasat Kenkuana. Simken ti panangngaasina kadakuada, gapu ta mabalin a saanda pay a nangan kabayatan ti tallo nga aldaw. Nupay kasta, nagsaludsod dagiti disipulona, “Kasano ti panna-kaadda ti adu a tinapay ditoy let-ang a pammussog iti nagadu unay a tao?” Kas iti kaaduanna kadatayo, nakita laeng dagiti disipulo no ania ti kurang.

“Ket ni Jesus kunana kadakuada, Mano dagiti tinapay nga adda kadakayo? Ket kinuna [dagiti disipulona], Pito, ken sumagmamano nga ik-ikan a babassit.

“Ket imbilin [ni Jesus] kadagiti adu a tao nga agtugawda iti daga.

“Ket innalana dagiti pito a tinapay ken ik-ikan, ket *nagyaman*, ket pinispisina, ket intedna kadagiti adalanna, ket dagiti adalan [disipulo] intedda kadagiti tao.”

Makita a nagyaman ti Mangisalakana iti no ania ti adda kadakuada—ket simmaruno ti maysa a milagro: “Ket nanganda amin ket nabsogda: ket immakupda pay kadagiti pispisi a natda, ti pito nga alat a napno.”⁴

Napadasantayo amin dagiti panawen nga agpokustayo iti no ania ti kurang kadatayo imbes a kadagiti parabur wenno bendisontayo. Kinuna ti

Greek philosopher a ni Epictetus, “Isu ket masirib a tao a saan nga aglad-ingit kadagiti banag nga awan kenkuana, ngem agrag-o ketdi kadagiti banag nga adda kenkuana.”⁵

Ti panagyaman ket maysa a nadiosan a pagbatayan. Impakaammo ti Apo babaen iti maysa a paltiing a naited ken ni Propeta Joseph Smith:

“Agyamankayo iti Apo a Diosyo iti amin a banag. . . .

“Ket awan ti pagbasolan ti tao iti Dios, wenno awan ti pakaaronan ti pungtotna, malaksid kadagiti saan a mangipudno iti imana ti amin a banag.”⁶

Iti Libro ni Mormon naibaga kadatayo nga “agyamankayo iti inaldaw, gapu iti nalabon a kaasi ken parabur nga ipapaay [ti Dios] kadakayo.”⁷

Ania man dagiti kasasaadtayo, adu dagiti pagyamanan ti tunggal maysa kadatayo no agsardengtayo laeng ket panunotentayo a naimbag dagiti naiparabur kadatayo.

Daytoy ti napintas a panawen a panagyan iti daga. Idinto ta adu dagiti biddut wenno maikaniwas iti lubong iti agdama, adu met dagiti banag nga umisu ken nasayaat. Adda dagiti nagballigi a panagasawa, nagannak a mangipatpateg kadagiti annakda ken agsakripisio para kadakuada, gagayyem a maseknan kadatayo ken tumultulong kadatayo, ken mannursuro a mangisuro. Naparaburan ti panagbiagtayo iti di mabilang a wagas.

Mabalintayo a paregtaen ti bagbagitayo ken kasta met dagiti dadduma no agkedkedtayo nga agtultuloy iti negatibo a panagpanunot ket pata-norentayo iti pusotayo ti maysa nga ugali a managyaman. No maibilang ti kinaawan panagyaman kadagiti nadaysen a basol, ngarud ti kinamanagyaman ti maysa kadagiti kataknengan a saguday. Adda maysa a nagkuna a “ti kinamanagyaman ket saan laeng a kaindaklan iti amin a saguday, no di ti nagtaudan ti amin a dadduma pay.”⁸

Kasano a mapatanortayo iti uneg ti puspustayo ti maysa nga ugali a managyaman? Ni Presidente Joseph F. Smith, maikanem a Presidente ti

Simbaan, ket nangted iti sungbat. Kinunana: “Makita ti managyaman a tao dagiti nakaad-adu a pagyamananna iti lubong, ket para kenkuana ad-adu nga amang ti naimbag ngem ti dakes. Ti ayat ket mangpamek iti apal, ket ti silaw ket mangpapanaw iti sipnget iti biagna.” Intuloyna: “Ti kinatangig ket mangdadael iti kinamanagyamantayo ket masukatan iti kinamanagimbukod. Anian a nakaragragstayo iti imatang ti maysa a managyaman ken managayat a kararua, ken anian a kinaannadtayo tapno mangpatanor, babaen ti managkararag a panagbiag, iti maysa nga ugali a kinamanagyaman iti Dios ken iti tao!”⁹

Ibagbaga ni Presidente Smith kadatayo a ti managkararag a panagbiag ket ti tulbek iti panangtagikua iti panagyaman.

Pagbalinennatay kadi a naragsak ken managyaman dagiti material a sanikua? Nalabit nga iti apagkanito. Nupay kasta, dagita a banag a mangipaay iti nalaus ken napaut a ragsak ken panagyaman ket isu dagiti banag a saan a magatang iti kuarta: dagiti pamiliatayo, ti ebanghelio, dagiti nasayaat a gagayyem, ti salun-attayo, dagiti kabaellantayo, ti ayat nga awawatentayo manipud kadagiti adda iti aglawlawtayo. Daksanggasat ta, sumagmamano laeng kadagitoy a banag a pangpalugodontayo iti bagbagitayo a mangtagibassit.

Insurat ti awtor nga Ingles a ni Aldous Huxley, “Kaaduanna a tao ti addaan iti dumani awan patinggana a kabaellan iti panangtagibassit kadagiti banag.”¹⁰

Masansan a tagibassitentayo dagiti mismo a tao a kangrunaan a maikari iti panagyamantayo. Saantayo koma nga aguray agingga a naladaw unayen kadatayo a mangipeksa iti dayta a panagyaman. Maipanggep kadagiti ay-ayaten a napukawnan, imbaga ti maysa a lalaki ti babawina iti kastoy: “Malagipko dagita a nararagsak nga aldaw, ket masansan a tarigagayak nga isao kadagiti lapayag dagiti natay ti panagyaman a naikari koma kadakuada idi sibibiagda pay, ken

mammano unay nga inawatda.”¹¹

Ti pannakapukaw dagiti ipatpateg ket dumani awan duadua a mangisangbay iti sumagmamano a babawi iti puspusotayo. Ikkatentatyo koma dagiti kasta a rikna agingga a mabalin kas tao babaen ti masansan a panangipeksatayo iti ayat ken panagyamantayo kadakuada. Ditayo kaano man ammo no kasano ti kabiit daytoy no naladaw unayen.

Ngarud, ti managyaman a puso ket sumangbay babaen ti panangyebkas iti panagyaman iti Nailangitan nga Amatayo para kadagiti paraburna ken kadagiti adda iti aglawlawtayo para iti amin nga insangbayda iti panagbiagtayo. Kasapulan daytoy iti napasnek nga aramid—agingga a ditayo sipupudno a masursuro wenno mapatanor ti maysa nga ugali a managyaman. Masansan a makariknatayo iti panagyaman ken *panggeptayo* a yebkas ti panagyamantayo ngem malipatantayo nga aramiden daytoy wenno awan panawentayo a mangaramid iti daytoy. Adda maysa a nagkuna a “ti panangrikna iti panagyaman ken saan a panangyebkas iti daytoy ket maipada iti panagbungon iti maysa a sagut ken saan a panangted iti daytoy.”¹²

No maipasangotayo kadagiti karit ken problema iti panagbiagtayo, masansan a narigat a mangipamaysa wenno mangipokus kadagiti paraburtayo. Nupay kasta, no sipapasnektayo a sapulen ken ikarigatantayo a sukisoken, marikna ken mabigbigtayto no kasano ti kaadu ti naiteden a parabur kadatayo.

Iburayko ti pakasaritaan ti maysa a pamilia a nakasarak kadagiti parabur iti baet dagiti nadagsen a pannubok. Pakasaritaan daytoy a nabasak adun a tawen ti napalabas ken intalimengko gapu iti mensahe nga ited daytoy. Insurat ni Gordon Green ken naipablaak iti maysa a magasin ti America nasurok a 50 a tawenen ti naglabas.

Salaysayen ni Gordon no kasano a dimmakel isuna iti maysa a bangkag iti Canada, a pagdardarasanda nga agkakabsat no kua nga agawid manipud iti pagadalan idinto ta agay-ayam dagiti dadduma pay nga ubbing iti bola

ken mapan aglangoy. Nupay kasta, kabaelan a tulongan ida ti amada a mangipaawat kadakuada a ti trabahoda ket adda pategna a maysa a banag. Nangnangruna a pumudno daytoy kalpasan ti panagapit no rambakan ti pamilia ti Thanksgiving [Panagyaman] gapu ta iti dayta nga aldaw ket inikkan ida ti amada iti naindaklan a maysa a regalo wenno sagut. Inimbentariona ti amin a banag a kukuada.

Iti bigat ti Thanksgiving inkuyogna ida iti bodega a yan dagiti bariles ti mansanas, dadakkel a pagikkan ti beets, dagiti karot a naibungon iti darat, ken ginabsuon a naisako a patatas kasta met kadagiti gisantes, mais, utong, jelly, strawberry, ken dadduma pay a naipreserba a prutas ken nateng a nangpunno kadagiti salansanda. Pinabilangna a naimbag kadagiti ubbing ti amin a banag. Kalpasanna rimmuarda a nagturong iti sarusar ket pinattapattada no mano a tonelada ti garami idiyay ken no mano a supot ti bukbukel iti uneg ti sarusar. Binilangda dagiti baka, baboy, manok, pabo, ken ganso. Kinuna ti amada a kayatna a makita no kasano ti kaadu a taraon ken kasapulan nga adda kadakuada, ngem ammoda a talaga a kayatna a maamirisda iti dayta nga aldaw ti pasken no kasano a silalabon wenno sibabaknang a pinaraburan ida ti Dios ket ginungonaanna ida iti amin nga oras a panagtrabahoda. Iti kamaudiananna, idi nagtugawda iti pasken nga insagana ti inada, dagiti parabur ket maysa a banag a nariknada.

Nupay kasta, impakita ni Gordon a ti Thanksgiving a nalagipna a kangrunaan unay a pagyamanan ket ti tawen a kasla awan a pulosda a pakapagyamanan.

Nasayaat ti rugi ti tawen: addaanda iti nabati a garami, adu a bukbukel nga imula, uppat a burias, ket adda sangkabassit a kuarta nga indulin ti amada tapno a panggatangnanto iti maysa nga aldaw iti hay loader—napintas a makina nga ar-arapaapen a matagikua ti kaaduan a mannalon. Daytoy pay ti tawen a simmangpet

ti koriente iti ilida—nupay saan pay kadakuada gapu ta dida pay kabaelan ti agpakonekta iti koriente.

Maysa a rabii, idi madama nga aglablaba iti sangagabsuon ti ina ni Gordon, inasitgan ti amana ket innalana ti washboard ket indawatna iti asawana nga aginana ket aggansilio. Kinunana, “Ad-adu ti orasmo iti panaglaban gem iti maturog. Kayatmo kadi nga agpakorientetayon?” Nupay naragsak iti namnamaen, nakalua isuna bayat ti panangpanunotna iti hay loader a saanen a magatang.

Ngarud naaddaanda iti linia ti koriente iti dayta a tawen. Nupay saan daytoy nga inarapaap, nakaalada iti maysa a washing machine nga agandar iti bukukodna iti agmalem ken dagiti nararaniag a bombilia a naibitin iti tunggal kisame. Awanen dagiti lampara a maikkan iti segdenna a lana, awanen dagiti pubelo a mageteng, awanen dagiti napigket a pagruaran ti asuk a maugasan. Naipakni a naidulin dagiti lampara iti attic.

Ti idadateng ti koriente iti bangkagda ket dumani a kaudian a napintas a banag a napasamak kadakuada iti dayta a tawen. Kas iti panangrugi a panagtubo dagiti mulada iti daga, kasta met a nangrugi ti panagtudo. Idi bim-maba ti danum iti kamaudianan, awan ti uray maysa a mula a nabati iti amin a namulaan. Nagmulada manen, ngem nagtultuloy a natuduan dagiti mulada iti daga. Nalungsot dagiti patatasda iti pitak. Inlakoda ti adu a bakada ken ti amin a baboy ken dadduma pay a dinguen nga insangratda a pagtalina-eden, a nakagun-od iti nakalakkala unay a gatad para kadakuada gapu ta nasken nga aramiden met ti kastoy ti amin. Amin a naapitda iti dayta a tawen ket ti sanganayon a singkamas a nupay kaskasano naispal iti bagyo.

Kalpasanna dimteng manen ti Thanksgiving. Kinuna ti inada, “Nasaysayaat no lipatentayo daytoy itoy a tawen. Awan pay uray maysa la koma a ganso a nabati.”

Nupay kasta, iti bigat ti Thanksgiving, nagpakita ti ama ni Gordon nga adda bitbitna a jack rabbit ket

kiniddawna iti asawana a mangluto iti daytoy. Nakarurod nga inrugina daytoy a pinarti, nga impakitana a nabayag a maluto dayta a nalakayanen nga ayup. Idi iti kamaudianan ket naikabilen daytoy iti rabaw ti lami-saan a kaabay dagiti singkamas a nakalasad, nagkedked a mangan dagiti ubbing. Nagsangit ti ina ni Gordon, ket kalpasanna nagaramid ti amana iti karkarna a banag. Immuli iti attic, nangala iti lampara, impanna iti lami-saan, ket sinindianna daytoy. Imbagana kadagiti ubbing nga iddependa dagiti silaw nga elektrik. Idi lampara laengen ti silaw, narigatanda a pasien a kastoy ti kasipngetna idi. Pinanunotda no kasano a makitada ti ania man a banag no awan dagiti naraniag a silaw a paglawagen ti elektrisidad.

Nabendisionan ti taraon, ket nangan ti amin. Idi malpas ti pangrabii, nagtugawda amin a siuulimek. Insurat ni Gordon:

“Iti nanumo a kinakudrep ti daan a lampara nangrugi a nakakitakami manen a silalawag. . . .

“Daytoy [ket] naimas a makan.

Kapada ti raman ti jack rabbit ti pabo ken ti singkamas ti kaimasan a makan a malagipmi. . . .

“ . . . [Ti] pagtaenganmi . . . , iti baet ti amin a pagkurangan daytoy, ket nabaknang wenna nalabon [para] kadakami.”¹³

Kakabsatko, ti mangyebkas iti panagyaman ket makaay-ayo ken madaydayaw, ti mangipatungpal iti panagyaman ket managparabur ken natakngeng, ngem ti agbiag nga adaan iti panagyaman iti puspusotayo ket mangsagid iti langit.

Bayat ti panangigibusko iti daytoy a bigat, ikarkararagko a kas pang-nayon iti amin a dadduma pay a pagyamanantayo, utobentayo koma ti panagyamanantayo iti Apo ken Mangisalakantayo, ni Jesucristo. Mangipaay ti nadayag nga ebangheliona kadagiti sungbat kadagiti kaindaklan a saludsod iti biag: Sadino ti naggapuantayo? Apay nga addatayo ditoy? Sadino ti papanan dagiti espiritutayo no mataytayo? Ti ebanghelio ti mangyeg kadagiti agbiag iti sipngget iti silaw ti nadosan a kinapudno.

Sinuruannatayo no kasano ti agkararag. Sinuruannatayo no kasano ti agbiag. Sinuruannatayo no kasano ti matay. Ti biagna ket tawid ti ayat. Inagasanna dagiti masakit; tinulongan ken pinaregtana dagiti marigrigat ken maidaddadanes; insalakanna ti managbasol.

Kangrunaanna, nagtakder a maymaysa. Pinagduaduan ti sumagmamano nga Apostolna; maysa ti nangliput Kenkuana. Binagkong dagiti Romano a soldado ti sikiganna. Ginudas ti makapungtot a bunggoy ti biagna. Mangmangngegan pay laeng manipud iti turod ti Golgota ti manangngaasi a balikasna: “Ama, pakawanem ida; ta dida ammo ti aramidenda.”¹⁴

Asino daytoy “maysa a tao ti ladingit, . . . ken napagsagaba”?¹⁵ “Siasino ti Ari ti gloria,”¹⁶ daytoy nga Apo dagiti apo? Isu ti Maestrotayo. Isu ti Mangisalakantayo Isu ti Anak ti Dios. Isu ti Akin-aramid iti Panna-kaisalakantayo. Agay-ayab, “Umaykay sumurot kaniak.”¹⁷ Imbilinna,

“Inkan, ket aramidem met ti kasta.”¹⁸ Impakaasina, “Tungpalenyo dagiti bilbilinko.”¹⁹

Surotentayo koma Isuna. Tuladentayo koma ti pagwadanna. Tungpalentayo koma dagiti balikasna. Babaen ti panangaramid iti kastoy, maitedentayo Kenkuana ti nadosan a sagut ti panagyaman.

Sipupudno ken naimpusuan nga ikarkararagko ta sapay koma a ma-utobentayo iti bukodtayo a panagbiag ti nakaskasdaaw a saguday ti panagyaman. Lumsok koma iti mismo a puspusotayo, ita ken kanayon. Iti sagrado a nagan ni Jesucristo, ti Mangisalakantayo, amen.

DAGITI NAGADAWAN

1. John Thompson, “Birthday Party,” *Teaching Little Fingers to Play* (1936), 8.
2. Lucas 17:11–19.
3. *Teachings of Gordon B. Hinckley* (1997), 250.
4. Kitaen iti Mateo 15:32–38; nainayon ti panangyunay-unay.
5. *The Discourses of Epictetus; with the Encheiridion and Fragments*, trans. George Long (1888), 429.
6. Doktrina ken Katulagan 59:7, 21.
7. Alma 34:38.
8. Cicero, in *A New Dictionary of Quotations on Historical Principles*, sel. H. L. Mencken (1942), 491.
9. Joseph F. Smith, *Gospel Doctrine*, maika-5 nga ed. (1939), 263.
10. Aldous Huxley, *Themes and Variations* (1954), 66.
11. William H. Davies, *The Autobiography of a Super-Tramp* (1908), 4.
12. William Arthur Ward, in Allen Klein, comp., *Change Your Life!* (2010), 15.
13. Naadaw manipud iti H. Gordon Green, “The Thanksgiving I Don’t Forget,” *Reader’s Digest*, Nob. 1956, 69–71.
14. Lucas 23:34.
15. Isaias 53:3.
16. Salmo 24:8.
17. Mateo 4:19.
18. Lucas 10:37.
19. Juan 14:15.

Panangisuro para iti Panawentayo

Dagiti adalen iti Melchizedek Priesthood ken Relief Society kadagiti maikapat a Domingo ket maisangratto iti “Dagiti Panangisuro para iti Panawentayo.” Mabalín nga isagana ti tunggal adalen manipud iti maysa wenna ad-adu pay a bitla a naited iti kallabes unay a sapasap a komperensia. Mabalín dagiti stake ken district president ti pumili no ania kadagiti bitla ti nasken a mausar, wenna mabalinda nga idutok ti pagrebbengan kadagiti bishop wenna branch president. Nasken a yunay-unay dagiti dadaulo ti kinapateg dagiti kakabsat iti Melchizedek Priesthood ken kakabsat iti Relief Sociey.

Dagiti dumardar-ay kadagiti adalen iti maikapat a Domingo ket maallukoy nga agadal ken mangitugot iti klase ti kaudian nga isyu ti magasin iti sapasap a komperensia.

Dagiti Singasing para iti Panangisagana iti maysa nga Adalen a naggapu kadagiti Bitla

Agkararagka tapno kaduaenna-kanto ti Espiritu Santo kabayatan ti panagadalmo ken panangisurom (kadagiti) bitla. Mabalín a masulisogka a mangisagana iti adalen nga usarem dagiti dadduma a material,

ngem dagiti bitla iti komperensia ti naanamongan a kurikulum. Ti naituding nga aramidem ket mangtulong kadagiti dadduma nga agsursuro ken agbiag iti ebanghelio kas naisuro iti kallabes unay a sapasap a komperensia ti Simbaan.


Subliem nga adalen (dagiti) bitla, a sapulem dagiti pagbatayan ken doktrina a mangipaay kadagiti kasapulan dagiti miembro ti klase. Kasta met a sapulem dagiti estoria, reperensia ti nasantuan a kasuratan, ken palawag manipud (kadagiti) bitla a makatulongto kenka a mangisuro kadagitoy a kinapudno.

Agaramidka iti maysa a balabala [outline] ti no kasano ti panangisurom kadagitoy a pagbatayan ken doktrina. Nasken a mairaman iti balabalam dagiti saludsod a makatulong kadagiti miembro ti klase:

- Sapulem dagiti pagbatayan ken doktrina [kadagiti] bitla.
- Panunotem ti maipapan iti kaipapananda.
- Iburay dagiti pannakaawat, kapanunotan, padas, ken pammaneknek.
- Yaplikar dagitoy a pagbatayan ken doktrina iti panagbiagda.

DAGITI BULAN	DAGITI MATERIAL NG ADALEN ITI MAIKAPATA-DOMINGO
Nobiembre 2010– Abril 2011	Dagiti bitla a naipablaak iti Nobiembre 2010 <i>Liahona</i> *
Mayo 2011– Oktubre 2011	Dagiti bitla a naipablaak iti Mayo 2011 <i>Liahona</i> *

**Sidadaan a magun-od dagitoy a bitla (iti adu a lengguahe) iti conference.lds.org.*



Ni Presidente Dieter F. Uchtdorf
Maikadua a Mammagbaga iti Umuna a Panguluhen

Maipanggep Kadagiti Banag a Naipangpangruna Unay

No ti biag ken ti nadaras a panagaddang daytoy ken dagiti adu a dadagsen ket nangparigat kadakayo a makarikna a kasla agragrag-okayo, ngarud nalabit nga ita ti kasayaatan a panawen tapno ulitenyo ti agpokus kadagiti a naipangpangruna unay.

Nakaskasdaaw no kasano ti kadayu ti mabalintayo a sursuruhen mapapan iti biag babaen ti panagadal iti nakaparsuaan. Kas pagarigan, kabaelan a kitaen dagiti sientista dagiti singsing dagiti mula a kayo ken mapugtuanda maipapan iti klima ken dagiti kasasaad ti panagdakkel ginasut ken uray pay rinibu a tawen ti napalabas. Maysa kadagiti banag a masursurotayo manipud iti panagadal iti panagdakkel dagiti mula a kayo ket no bayat dagiti panawen a mayannatup dagiti kasasaad, dumakkel dagiti mula a kayo iti gagangay a kadasar. Nupay kasta, bayat dagiti panawen a no saan a mayannatup dagiti kasasaad ti panagdakkel, pabayagen dagiti mula

a kayo ti panagdakkelda ket itedda ti enerhiada kadagiti kangrunaan nga elemento para iti panagbiagda.

Iti daytoy a gundaway mabalin a panunoten ti sumagmamano kadayo, “Amin dagita ket naimbag ken nasayaat, ngem ania kadi ti pakainaganna iti panagpatayab iti maysa nga eroplano?” No kasta, bay-andak a magisarita kadakayo.

Addakayo kadin iti uneg ti eroplano ket nakapadaskayo iti ungor [turbulence]? Ti gagangay unay a gapu ti ungor ket ti kellaat a panagbaliw iti garaw ti angin a makaigapu iti panagsuek, panagtayyek, ken panagtulid ti eroplano. Idinto a nabangon dagiti eroplano tapno mangsarked iti

dakdakkell pay nga amang nga ungor ngem iti ania man a banag a pakaipasanguanyo iti gagangay a panagtayab (ti eroplano), mabalin a mangpalaranta pay laeng kadagiti pasahero.

Ania iti panagkunayo a nasken nga aramiden dagiti piloto no maipasangoda iti ungor? Mabalin a panunoten ti estudiante a piloto a ti panangpalisto iti pardas [speed] ket nasayaat nga estratehia gapu ta al-alisto a malasatdanto ti ungor. Ngem mabalin a biddut nga aramiden dayta. Mawatwan dagiti propesional a piloto nga adda optimum turbulence penetration speed a mangpabassit kadagiti negatibo nga epekto ti ungor [turbulence]. Ken kaaduanna a gundaway a kaipapanan dayta ti mangpainsayad iti pardasmo. Mayaplikar met ti kasta a pagbatayan kadagiti bukol [speed bumps] iti maysa a kalsada.

Ngarud, napintas a balakad nga aginnayad bassit, agtalinaed iti dalan, ken agpokus kadagiti napapateg a banag no makapadas kadagiti napeggad a kasasaad.

Ti Panagaddang ti Kabaruanan a Biag

Simple daytoy ngem napateg nga adal a sursuruhen. Mabalin a kasla adda pakainaganna iti lohiko no mayebkas nga usaren dagiti balikas maipapan kadagiti mula a kayo wenno ungor, ngem makapasiddaaw no kasano ti kalaka ti saan a panangikankano iti daytoy nga adal no maipanggep iti panangipakat kadagitoy a pagbatayan iti bukodtayo nga aginaldaw a biag. No napalaus ti pannakaburibor, no adda pannakapupay, no adda dumteng a trahedia, masansan unay a gandotentayo nga ituloy ti isu met laeng a nakaam-amak

a panagaddang, wenna uray pay naparpardas pay, a pampanunoten no kaskasano a ti ad-adda pay a panangpapardas iti panagaddangtayo, ket makaibanagtayo a nasaysayaat.

Maysa kadagiti kababalin ti kabaruanan a panagbiag ket kasla agtigtigtaytayto iti umal-alisto a kapardas, iti baet ti ungor wenna dagiti tubeng.

Agbalintayo koma a napudno; nalaklaka ti makumikom. Makapaganunottayo amin iti listaan dagiti aramiden a mangrimbaw kadagiti iskediultayo. Mabalina panunoten ti sumagmamano nga agpannuray ti pateg-ti-bagida iti kaatiddog ti listaan dagiti aramidenda a nasken nga ipatungpal. Punnuenda dagiti nawaya nga orasda kadagiti listaan dagiti taripnong ken babassit wenna awan kaes-eskanna a banag—uray pay iti panawen ti pannakaburibor ken pannakabannog. Gapu ta saan a kasapulan nga aramidenda a komplikado wenna naay-ay ti panagbiagda, masansan a makarikhada iti nalasa a pannakaupay, ken bassit unay ti kaipapanan iti biagda.

Makuna nga ania man a saguday no maaramid nga aglablabes ket agbalin a maysa a bisio. Ti nalabes a panagiskediul kadagiti aldawtayo ket awan duadua a maikari iti daytoy. Dumteng ti gundaway a dagiti naturpos wenna naileppastayo ket agbalin a tubeng ken ambision, a saan a maliklikan a dadagsen a manglapped iti panagdur-astayo.

Ania ti Pangrisut?

Maawatan ken maipakat dagiti masirib dagiti adal maipapan kadagiti singsing ti mula a kayo ken ungor ti angin. Pagkedkedanda ti sulisog a makamakam iti nakaam-amak a panagdardaras ti aginaldaw a panagbiag. Surotenda ti balakad a “Ad-adu pay a banag iti biag ngem iti panangpaalisto iti pardas.”¹ Iti ababa a pan-nao, ipamaysa wenna ipokusda dagiti banag a naipangpangruna unay.

Insuro ni Elder Dallin H. Oaks, iti kallabes unay a sapaasap a kompetensia, “Nasken nga isardeng wenna

tallikudantayo ti sumagmamano a nasayaat a banag tapno makapilitayo kadagiti sabali a nasaysayaat wenna kasayaatan gapu ta patanorenda ti pammati ken ni Apo Jesucristo ken mangpapigsa kadagiti pamiliatayo.”²

Ti panagsapsapul kadagiti kasayaatan a banag ket awan duadua a mangiturong kadagiti kangrunaan a pagbatayan ti ebanghelio ni Jesucristo—dagiti simple ken napipintas a kinapudno nga impaltiing wenna impakaammo kadatayo ti manangipateg, agnanayon, ken mannakaammo-iti-amin nga Ama iti Langit. Dagitoy napapateg a doktrina ken pagbatayan, nupay simple tapno maawatan ti maysa nga ubing, ket mangipaay kadagiti sungbat kadagiti karirigatan a saludsod ti biag.

Adda kinangayed ken kinalawag nga aggapu iti kinasimple a no dadduma saantayo a mabigbig ti pategna iti panagtarigagaytayo kadagiti narigat a pangrisut.

Kas pagarigan, saan pay a nabayag kalpasan ti panangdaliasat dagiti astronaut ken cosmonaut iti aglawlaw ti planeta a daga idi maamirisda a saan nga agandar dagiti ballpoint pen iti law-ang. Ket nagtrabaho ti sumagmamano a masirib a tattao a mangrisut iti problema. Nangbubos ti rinibu nga oras ken minilion a doliar, ngem iti udina, nangpatanorda iti maysa a pluma a makasurat iti sadino man a lugar, iti ania man a temperatura, ken iti dumani ania man a rabaw ti banag. Ngem kasano nga agpipinnulapol dagiti astronaut ken cosmonaut agingga a saan a marisut ti problema? Inusarda laeng ti maysa a lapis.

Naadaw ti sao ni Leonardo da Vinci a kunana a “ti kinasimple ket kangrunaan a kinaimbag.”³ No kitaentayo dagiti pagbatayan a pundasion ti plano ti kinaragsak, ti plano ti pannakaisalakan, mabigbig ken makapagyamantayo iti kinalawag ken kinasimplena ti kinadaeg ken kinangayed ti sirib ti Nailangitan nga Amatayo. Kalpasanna, ti panagaramidtayto kadagiti bilinna ket ti rugit ti siribtayto.

Ti Bileg dagiti Pangrugian

Naisarita ti estoria a ti coach ti football a ni Vince Lombardi ket adda ritual nga inaramidna iti umuna nga aldaw ti panagsanay. Ingatona no kua ti putbol, ipakitana kadagiti atleta a nagay-ayamen iti putbol iti uneg ti adu a tawen, ket kunana, Babbaro. . . . *daytoy* ket maysa a putbol!” Insaritana maipapan iti kadakkel ken sukog daytoy, no kasano a makugtaran, masippaw, ken maipasa daytoy. Inruarna ti bunggoy nga impan iti awan mulana a talon ket kinunana, “Daytoy ti talon a pagay-ayaman iti putbol.” Impasiarna ida iti lawlaw, nga inladawanna dagiti dimension, ti sukog, dagiti annuroten, ken no kasano a maay-ayam ti putbol.⁴

Ammo daytoy a coach nga uray dagiti eksperiensado a mannayam, ken kinapudnona ti bunggoy, ket makapagbalinda laeng a naindaklan babaen ti panagadalda a naimbag kadagiti kangrunaan a kasapulan ti ay-ayam. Mabalinda a bubosen ti panawenda iti panagsanay kadagiti narigat ken nasikap nga ay-ayam, ngem agingga a saanda a maadal a nasayaat dagiti kangrunaan a kasapulan ti ay-ayam, saanda a makapagbalin a kampeonato a bunggoy iti kaano man.

Panagkunak kaaduan kadatayo ti saan unay a makaawat no kasano ti kinapateg dagiti kangrunaan. No dadduma laeng ket maisturbotayo kadagiti adu a banag a kasla ad-adda a makagargari.

Dagiti naimaldit a material, naddumaduma a pagadawan ti media, dagiti electronic tools ken gadgets—makatulong amin dagitoy no umno ti pannakausarda—makapagbalin a makapasakit a pagliwliwaan wenna naulpit a pannakailasin kadagiti dadduma a tao.

Ngem iti baet ti adu a timek ken pili, nagtakder ti nanumo a Tao ti Galilea a nakaunnat dagiti imana, nga agur-uray. Simple ti mensahena: “Umaykay, sumurot kaniak.”⁵ Ket saan nga agsao nga agusar iti mikropono no di iti naalumamay, bassit a timek.⁶ Nalaka a mapukaw ti

pangrugian a mensahe ti ebanghelio iti baet ti panaglayus ti impormasion a mangtinep kadatayo iti amin a sulii.

Dagiti nasantuan a kasuratan ken ti naisawang a balikas dagiti sibibiag a propeta ket mangted iti panangyuna-unay kadagiti kangrunaan a pagbatayan ken doktrina ti ebanghelio. Ti gapu ti panagsublitalyo kadagitoy a pagbatayan a pundasion, kadagiti natarnaw a doktrina, ket gapu ta isuda ti ruangan kadagiti kinapudno ti nauneg a kaipapanan. Isuda ti ridaw kadagiti padas ti makaparegta a kinapateg nga iti sabali a wagas ket aglabes iti kabaellantayo a maawatan. Dagitoy simple, pangrugian a pagbatayan ket tulbek iti panagbiag a maitunos iti Dios ken tao. Isuda dagiti tulbek iti pananglukat kadagiti tawa ti langit. Iturongdatayo iti talna, rag-o, ken pannakaawat nga inkari ti Nailangitan nga Ama kadagiti annakna a dumngeg ken agtungpal Kenkuana.

Patpatgek a kakabsat, makaaramid-tayo a naimbag iti panagin-innyad basit, mangrugi iti kasayaatan a pardas para kadagiti kasasaadtayo, agpokustayo kadagiti napapateg, imulagattayo dagiti matatayo, ket sipupudno a kitaentay dagiti banag a naipangpangruna unay. Tungpalentayo koma dagiti pundasion a pammilin nga inted ti Nailangitan nga Amatayo kadagiti annakna a mangipasdek iti pagibasaran ti nabaknang ken nabunga a mortal a biag nga addaan kadagiti kari ti agnayanon a kinaragsak. Isuda ti mangisuro kadatayo a mangaramid “amin dagitoy a banag a nainsiriban ken naurnos; agsipud ta saan a masapul nga agtaray[tayo] iti naparpardas ngem iti kabaellan[tayo]. [Ngem] nasken a naregta[tayo], [ken] tapno magun-od ti gungguna.”⁷

Kakabsat, ti napasnek a panangaramid kadagiti banag a naipangpangruna unay ket mangiturongto kadatayo iti Mangisalakian ti lubong. Daya ti gapu no apay nga “agsaotayo iti maipanggep ken ni Cristo, agragotayo ken ni Cristo, ikasabatayo ni Cristo, . . . tapno maammuan[tayo] ti pamuidan[tayo] a mangkita iti

pakaugasan dagiti basbasol[tayo].”⁸ Iti kinarigat wenna kompleksidad, pannakatikaw, ken panagdardaras ti kabaruanan a panagbiag, daytoy ti “nalalaing a wagas.”⁹

Ngarud, Ania dagiti Pangrugian?

Bayat ti yaasidegtayo iti Nailangitan nga Amatayo ket kalikagumantayo ti siribna a maipanggep kadagiti banag a naipangpangruna unay, agtultuloy a masursurotayo manen ti pateg ti uppat a kangrunaan a relasiontayo: iti Dios-tayo, kadagiti pamiliatayo, iti padatayo a tao, ken iti bagbagitayo. Bayat ti panangamiristayo iti bukodtayo a biag nga addaan iti natallugod a panunot, makitatayonto no sadino ti nakaipantantayo manipud iti nalalaing a wagas. Maluktanto dagiti mata ti pannakaawattayo, ken mabigbigtayonto no ania dagiti kasapulan nga aramiden tapno mapatarnaw ti pusotayo ket ipamaysa wenna ipokustayo ti biagtayo.

Umuna, ti relasiontayo iti Dios ket kasagraduan ken kapatgan. Datayo dagiti espiritu nga annakna. Isu ti Amatayo. Tarigagayanna ti ragsaktayo. Bayat ti panangsapultayo Kenkuana, bayat ti panangsursurotayo maipapan iti Anakna, ni Jesucristo, bayat ti pananglukattayo iti puspusotayo iti impluensia ti Nasantuan nga Espiritu, agbalin a natibker ken natalged ti biagtayo. Mapadasantayo ti dakdakkal a talna, rag-o, ken pannakapnek bayat ti panagaramid-tayo iti amin a kabaellantayo nga agbiag a mayannurot iti agnanayanon a plano ti Dios ken agtungpal kadagiti bilinna.

Mapasayaattayo ti relasiontayo iti Nailangitan nga Amatayo babaen ti panangsursuro maipapan Kenkuana, babaen ti panagkararag Kenkuana, babaen ti panagbabawi kadagiti basbasoltayo, ken babaen ti naregta a panangsurot ken ni Jesucristo, “awan ti umay ken Ama, no di magna ken [Cristo].”¹⁰ Tapno mapapigsa ti relasiontayo iti Dios, kasapulantayo ti mangbubos iti sumagmamano a napateg a panawen Kenkuana a datayo laeng. Sitalalna a panangipokus iti inaldaw a bukod

a panagkararag ken panagadal iti nasantuan a kasuratan, a kanayon a panagkalikagum nga agbalin a maikari iti maysa nga agdama a rekomenda iti templo—dagitoy ket sumagmamano a puonan ti panawen ken panagkagumaantayo nga umasideg nga ad-adda pay iti Nailangitan nga Amatayo. Iksatoyon koma ti awis iti Salmu: “Agtalnakayo, ket ammuenyon a siak ti Dios.”¹¹

Ti maikadua a kangrunaan a relasion ket kadagiti pamiliatayo. Gapu ta “awan sabali pay a balligi ti mangsukat iti pannakapaay”¹² ditoy, nasken nga ikkantayo iti nangato a panangipangpangruna dagiti pamiliatayo. Mangbuangaytayon kadagiti nauneg ken managayat a relasion ti pamilia babaen ti panagaramid kadagit simple a banag a sangkamaysa, kas iti pangrabii ti pamilia ken family home evening ken babaen laeng ti panagragragsak a sangkamaysa. Kadagiti relasion ti pamilia *ti ayat* ket pudno a mayebkas babaen iti *o-r-a-s*, kadagiti pamiliatayo. Ti kaadda iti panawen para iti tunggal maysa ket kangrunaan iti panagtutunos iti pagtaengan. Makisarita, imbes nga agsarita maipapan, iti tunggal maysa. Agsursuro manipud iti tunggal maysa, ken bigbigen ti pateg dagiti pagdudumaantayo kasta met dagiti pagpapadaantayo. Mangipasdektayo iti nadiosan a begkes iti tunggal maysa bayat ti yaasidegtayo a sangkamaysa iti Dios babaen ti panagkararag a sangapamiliaan, panagadal iti ebanghelio, ken panagdaydayaw iti Domingo.

Ti maikatlo a kangrunaan a relasion nga adda kadatayo ket iti padatayo a tao. Bangonentayo daytoy a relasion iti tunggal maysa a tao iti maminsan—babaen ti panagbalin a managrikna kadagiti kasapulan dagiti dadduma, panagserbi kadakuada, ken panangted iti panawen ken talentotayo. Nalaus ti pannakaawis ti riknak ti maysa a kabsat a babai a napadagsenan iti adu a pannubok ti edad ken sakit ngem inkeddengna a nupay saan unay a

makaaramid iti ad-adu pay, mabalinna ti dumngeg. Ket ngarud iti tunggal lawas siniputanna dagiti tao a maburiboran wenno maup-upay, ket imbusosna ti orasna kadakuada, iti panagdengngeg. Anian a bendision isuna iti biag ti nakaad-adu a tao.

Ti maikapat a kangrunaan a relation ket iti bagbagitayo. Mabalin a kasla di gagangay a panunoten ti kaadda ti relation iti bagbagitayo, ngem ar-aramidentayo. Adda dagiti tao a saan a makapulapol iti bagbagida. Dillawen ken tagibassitenda ti bagbagida iti agmalem ayingga a mangrugi a kagurada ti bagbagida. Bay-andak a mangisingasing a pabassitenyo ti panagdardaras ket ikkanyo iti nayon pay nga oras ammuenyoy a nasaysayaat ti bagiyo. Mangnakayo iti nakaparsuaan, buyaenyoy ti panagsingising ti init, agragsak kadagiti pinarsua ti Dios, utoben dagiti kinapudno ti naisubli nga ebanghelio, ket ammuenyoy no ania ti kaipapananda kenka iti bukodmo. Sursuruem a kitaem ti bagim kas iti panangkita ti Nailangitan nga Ama kenka—kas napateg nga anakna nga addaan iti nadiosan a potensial.

Arag-o iti Natarnaw nga Ebanghelio

Kakabsat, agbalintayo koma a masirib. Umasidegtayo kadagiti natarnaw a danum ti doktrina ti naisubli nga ebanghelio ni Jesucristo. Sirarag-tayo koma a makiranud kadagitoy iti kinasimple ken kinalawagda. Nakalukat manen dagiti langit. Adda manen ti ebanghelio ni Jesucristo iti rabaw ti daga, ken dagiti simple a kinapudnona ket nawadwad a pagtaudan ti rag-o!

Kakabsat, agpayso nga adda dakkel a gapu tapno agragsaktayo. Iti biag ken iti napardas a panagaddangna ken ti adu a dadagsen ket mangparigat kadakayo tapno makarikna iti panarag-o, ngarud nalabit nga itan ti napintas a panawen a mangipokus manen iti no ania ti naipangpangruna unay.

Tumaud ti pigsa saan nga iti nakadadanag nga aramid no di ketdi manipud iti pannakaikabil iti maysa a natibker a pundasion ti kinapudno ken lawag. Tumaud daytoy manipud iti panangipamaysatayo iti pasnek ken panagkagumaantayo kadagiti pangrugian [basics] ti naisubli nga ebanghelio ni Jesucristo. Tumaud daytoy manipud iti panangikasotayo kadagiti nadiosan a

banag a naipangpangruna unay.

Aramidentayo koma a nasimsimple pay bassit ti biagtayo. Aramidentayo koma dagiti panagbalbaliw a kasapulan iti panangipokus manen iti biagtayo iti nangayed a kinasimple, nanumo a dalan ti kinadisipulo a Cristiano—ti dalan a mangiturong a kanayon iti biag a napnuan iti kaipapanan, kinaragsak, ken kinatalna. Iti daytoy, agkararag-gak, bayat ti panangibatik iti pamendisionko, iti sagrado a nagan ni Jesucristo, amen.

DAGITI NAGADAWAN

1. Mahatma Gandhi, iti Larry Chang, *Wisdom for the Soul* (2006), 356.
2. Dallin H. Oaks, “Good, Better, Best,” *Liahona*, Nob. 2007, 107.
3. Leonardo da Vinci, iti John Cook, comp., *The Book of Positive Quotations*, maika-2 nga ed. (1993), 262.
4. Vince Lombardi, iti Donald T. Phillips, *Run to Win: Vince Lombardi on Coaching and Leadership* (2001), 92.
5. Lucas 18:22.
6. Kitaen iti 1 Ar-ari 19:12.
7. Mosiah 4:27.
8. 2 Nephi 25:26.
9. 1 Taga-Corinto 12:31; Ether 12:11.
10. Juan 14:6.
11. Salmo 46:10.
12. J. E. McCulloch, *Home: The Savior of Civilization* (1924), 42; kitaen met iti Conference Report, Abr. 1935, 116.